

•sawcuenh•

Mingh Vadauz

□ Yiz Ciz / 余执

It

Dieg gou dwg dieg rungh, cibgeij goengleix baedauq cungj dwg bya sang, gaxgonq mbouj doeng roen mbouj doeng dien hix mbouj doeng dien hvah. Gyoengq vunzmbanj cungj bouboux lauxsaed gaenxhong, baez ranzrongh couh bae guh hongreihnaz, mbwn laep couh haeuj ninz. Miz di goj, miz di vah, miz di saeh, cungj dwg bouxgeq naeuz yienghlawz couhdwg yienghhaenx, hawj mwngz dingq hix aeu dingq, mbouj dingq hix aeu dingq, hawj mwngz guh hix aeu guh, mbouj guh hix aeu guh.

Youq dieg gou, bouxgeq cungj naeuz, miz cungj vunz ndeu ndaw mingh de daiq miz vadauz, heuhguh minghvadauz. Bousai miz mingh-vadauz, miz dahsau lai, seiqvunz aeu bous neix lij naemj aeu bous de; mehmbwk miz minghvadauz, miz daegmbauq lai, seiqvunz haq bous neix lij naemj haq bous de. Mbouj rox dwg caen roxnaeuz dwg gyaj, ciuhgeq couh miz fwen baenzneix eu:

Vadauz hai ndwenngieih,
Ndingfeifei gwnz go,
Song sam ngoenz couh roz,
Ce go daengj soengsangq.

Gij fwen neix couhdwg naeuz, vadauz ndeiawj dwg ndeiawj, va hai mbouj ndaej geij nanz. Vunz cungj naeuz, Daeglunz ndaw mbanj couh-dwg miz mingh vadauz.

Ngeih

Daeglunz vunz mbouj hung hix mbouj sang, de mbouj suenq baenz-mbauq, mbouj rox vihmaz, dahsau couhdwg maij de gyaez de.

Bihaenx mbanj gou miz 17 bous lwgsai cuhcungh bizyez, cij miz gou caeuj daeg he ndaej bae doeg gauhcungh, Daeglunz caeuj gyoengq doengzdoh couh maranz guhhong.

Seizhaenx ranzlawz yaek aeu bawx, dingzlai dwg bohmei ra hawj, bohmei raen mbanj gyae mbanj gyawj miz saek dahsau hab' ei q guh bawx, couh cawx di dangz caeuj bingj heuh mehmoiz bae cam dahsau. Bohmei dahsau raen hab rim hab' ei q, couh heuh dahsau lingx aeu gij dangz gij bingj mehmoiz dawz daeuj, dahsau lingx aeu dangz bingj, gienh saeh neix couh suenq baenz lo. Ciep roengz-daeuj bouxgeq couh ra ngoenzndei daeuj cingj laeuj, angqangq yangz-yangz coux bawx haq lwg.

Ndaw mbanj gyoengq doengzdoh lij caengz miz saek bous ra ndaej yah, Daeglunz ndaej 20 bi seiz couh coux Dahcinj daengz ranz guh yah, seiz-haenx mbouj yungh bae dwnghgi aeu gezvwnhcwng, song bous doengz aen congz he baenz ninz, couhsuenq baenz

gvanbaz lo.

Daeglunz caeuj Dahcinj guh gvanbaz bi daihngieih, Dahcinj seng dahlwg ndeu, bouxcoz baenz boh mbouj rox baenzlawz ciengx lwg, seng lwg ok ndang le, cungj dwg bouxgeq ganq lai. Miz boh miz meh youq ndawranz, Daeglunz engq mbouj yungh sinhoj, vunzmbanj doxcaeuj okbae dajgoeng, Daeglunz hix aemq daeh okbae lo.

Gyoengq doengzdoh mizmbangj bae Gvangjdungh, mizmbangj bae Sanghaij. Daeglunz miz bawxmoq caeuj lwgnumh youq ranz, de mbouj naemj bae dieggyae, de daeuj daengz Baksak caeuj vunz guh ranzlaeuz. Baksak dwg aen Si gaeuqgeq ndeu, seizneix cingq hwnz guh ranz moq caeuj roen moq, hong gig lai. Daeglunz bous vunz neix dinfwnz ndei, de rox caep cien, rox bae naez, lij rox guh hong gangghinh dem, ngaenz hong cungj lingx ndaej beij vunzdoh lai, lij ndaej bousdaez yawj naek.

Dahcinj seng dahlwg daihngieih seiz, Daeglunz maranz gvaqcieng, godaih Dahcinj daeuj daengz ranz Daeglunz, naeuz: "Nuengxgwiz ha, Dahlwg gou Dahgyaemq hix ndaej 20 bi lo, youq ranz hix mbouj rox bae gyawz ra faen ngaenz lawz, mwngz baezneix okbae, couh daiq de itheij okbae ra hong guh ba."

Dahgyaemq heuh Dahcinj guh mehguh, Daeglunz mbouj youq ranz, mwh hong nyaengq mbouj bienh seiz, Dahgyaemq hix ciengzciengz daeuj bang Dahcinj daiqdaiq lwg, guhguh hongreih hongnaz, seizneix godaih baenzneix daeuj gouz, mbouj daiq okbae caen mbouj miz naj doi q de lo.

Gwn cieng gvaq, Dahgyaemq couh gaen Daeglunz bae Baksak, Dahgyaemq doi q Dahcinj naeuz: "Gux, caj lwg loq hung le, mwngz hix bae Baksak ba, youq ranz sinhoj lai."

Dahcinj naeuz: "Ndei, mwngz sien gaen boh' au mwngz bae gonq, gvaq bi song bi dem, lwgnyaeq rox byaij le, gou couh bae gaen sou."

Sam

Dahgyaemq vunz sang noh oi q, byoem ndaemndatndat, da ronghrikrik, bous raen bous gyaez. De daeuj daengz ndaw singz Baksak, roxnyinh gizgiz moqsaksak, gizgiz gyaunde, youq aen si neix, byawz hix mbouj roxnaj, laj mbouj sug dieg, baebae dauqdaug cungj aeu gaen Daeglunz.

Daeglunz co ranz youq, lij ndei, aen ranz co neix hix gaeuq gvangq, song mbaw baengz hoij youq gyang rug, couh ndaej an roengz song aen congz lo. Daeglunh ninz aen congz he, Dahgyaemq ninz aen congz he.



Haemh ndeu, gaenq hwnz lo, Daeglunz gwn laeuj fizfangfang haeuj ranz daeuj, de saemxsamx saxsax byaij mbouj baenz yamq, bibi buengq-buengq ndwn mbouj onj. Dahgyaemq ngamq duet buh haeuj ninz, raen Daeglunz yienghneix, de riengjret daj gwnz congz saet roengzdaeuj, gvaqbae fuz Daeglunz. Daeglunz vang haeuj congz bae couh yaek ninz, Dahgyaemq raen mbouj ndei, couh bae daek bat raemxraeuj he daeuj bang de swiq din mad naj. Guh ndei gijneix, de cij umj Daeglunz hwnj congz de bae, caih de ninz vang ninz raeh.

Youq gwnz ranz, daxboh hix ciengzseiz yienghneix fiz laeuj, Dahgyaemq hix ciengzseiz yienghneix dajleix daxboh.

Dahgyaemq youq aen gunghswb Daeglunz guhhong. Daeglunz seiz-neix gaenq dwg gunghswb bousdaez iq ndeu, miz boh' au dang bousdaez, Dahgyaemq mbouj yungh guh hong naek, de couh youq ndaw ranzbanh-goeng geiqgeiq soq, bae neix bae haenx banhbanh saeh couh gvaq ngoenz lo.

Ngoenz ndeu, Daeglunz mbouj raen Dahgyaemq daeuj hwnjban, de maranz yawjyawj, seizneix Dahgyamq lij ninz ndaw congz. Daeglunz gvaq-bae cam de baenzlawz yiengh lo, Dahgyaemq naeuz nohndat gyaauj-ngunh lai, Daeglunz iet fwngz gvaq-bae lumhlumh gwnz najbyak Dahgyaemq. Aen naj Dahgyaemq ndat lumj raemxgoenj nei, Daeglunz naeuz: "Yienghneix ninz youq mbouj baenz, aeu bae yihyen cij ndaej." Daeglunz fuz hwnj Dahgyaemq, naemj fuz de okrog bae, Dahgyaemq byaij mbouj ndaej, Daeglunz cijndaej goengz-yongq roengzdaeuj, aemq hwnj Dahgyaemq. Miz vah naeuz "Lwgsau 18, mak henj gwnz go, bous raen bous iet hoz". Seizneix, Daeglunz hix roxnyinh aen aek Dahgyaemq nem youq baihlaeng de, dwg ndat, dwg raeuj,

dwg unq, dwg rang, naemj dwg maz couhdwg maz. Daeglunz naemj dwk naemj dwk, baenzlawz aemq Dahgyaemq daengz laj laeuz hix mbouj rox, aen sim de miz di fiz lo.

Ciengz byaij henz dah, din vaq baenzlawz mbouj dwk raemx, fwnzsauj caeuj feiz cuengq youq itheij, baenz-lawz haeujsim miz ngoenz he hix rox remj. Dahgyaemq mizndang lo, de cam Daeglunz yaek Baenzlawz dajsuenq, Daeglunz naeuz: "Ciuq saedsaeh lwnh hawj vunz ndawranz dingq ba."

Haicin seizhaenx, vadauz cingq hai hoengh, Daeglunz dauq daengz ranz, doi q Dahcinj naeuz de gaenq caeuj Dahgyaemq baenzneix baenz-neix, caih Dahcinj naemj baenzlawz yiengh couh baenzlawz yiengh. Daeglunz naeuz: "Mwngz naemjnaemj ba, yaek lingh haq vunz roxnaeuz youq ranz ciengx lwg. Danghnaeuz mwngz mbouj haq vunz, aen ranzcoj neix gou ce hawj mwngz, gou lij ok ngaenz ciengx mwngz caeuj ciengx song dahlwg dem. Danghnaeuz mwngz lingh haq vunz, gou hix mbouj hah, mwngz naemj ndei le soengq vah hawj gou."

Baih he dwg daeggvn, baih he dwg dahlan, baenzlawz guh, Dahcinj mbouj hoiz vah, hix mbouj rox baenzlawz hoiz vah, de gietdingh youq ranz ciengx lwg, youq ranz guh hong, caih Daeglunz caeuj Dahgyaemq youq baihrog baenzlawz gvaq couh baenzlawz gvaq.

Daeglunz caeuj Dahgyaemq bae minzcwnngiz dwnghgi lo, doenghbi daengz ciet gvaq cieng, Daeglunz caeuj Dahgyaemq hix dauq ranzcoj gvaq, Dahcinj caeuj Dahgyaemq caemh daiz gwn haeux, gux lan cungj mbouj miz vah gangj. Daeglunz caeuj Dahcinj caemh ranz youq, song bous hix mbouj rox gangj maz, saedcej couh yienghneix gazngadngad gvaq roengzbae.

(caengz sat)